

PORI MA KARESIÁ NANIN BANTA UVAMAN AMEIN BOMPON MINO

(Karesia)

Karesia Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ano ma ma vompon uvantein nan kan ineinen iyan mino.

(1) Karesiá barafin ma Pisidiá distrikifin ma sautí bain baru kayo Antiokí bá Aikoniamí bá Ristará bá inká Debé bápín ma esé araíen monó dorarí uren ma avían mantakhá eimpin minon ten iniyan maen inká

(2) Karesiá barafin ma notí bain baru kayofin ma kan dadasí en monó dorarí ukhá ein ne sen iniyan mino. Taréa ma Teki e siyain barafin mi Karesiá bara varen mino.

Uvarein orana ino.

(1) Karesiá barafin ma sautí bain kéká ma uvaman amikhanten maen mai AD foti-eiti (48) fin nafi áa foti-naini (49) fin nafin uvanten mino. Mai maen kanisori kayo ano ída Yerusaremí átaru ukhan mino.

(2) Inká Karesiá barafin ma notí bain kéká ma uvaman amikhanten maen mai AD fifti-siksi (56) fin nafi áa fifti-seveni (57) fin nafin uvanten mino. Mai maen Romú nanin banta ída vompon uvaman amikhnen mino.

Ma vompon ma uvantein baru ino.

Kanisori átarufá Yerusaremí oriyáken nafi áa Masedonia safi áa Koriní barurá ma kanú manau dadasí en ma monó doraríen noren ma e váken nafin ten iniyan mino.

Ma vompon ma uvaman amikhein kéká ino.

Pori ma Karesiá barafin esé araíen monó dorarí iyákan ma mumunan ukhá ein kékápin nafi áa kan dádasi ma en monó dorarí íkan ma mumunan ein kékápin nafi non ten iniyan mino.

Nái ana vará ma vompon uvanten nafino.

Monó nanin banta ma Pori afova amiyan ma Yisas Karaisintá ma mumunan esin maen mai avúavá anon auu ída manten ne sinten mino ma sikhá ein me ampiren man baya ánain bákuriyaimpin mino. Kampun banta kayo ano kampun afova amiren enará ukhein bayafó banasi aviren tavi aasá oriyan mifo Pori ano vei vava varen orin doran nan pura sen ákona vain doran ne sen maman amá ukhen mino. Karesiá nanin banta ano ma Yutan kékái avúavá ánain ma yakha fono van ma auu khavin daná ma maman kainten maen mai vetimpin manan minó afova van mino. Mai man bayai karavusii sá inten nafi áa Yisasin pinté uaren ná auu ivan kékasi inten nafi mai vetíi anunu ino. Máan tukhen mifo mai ma monó nanin bantaí ukhen ma amusin dosiyá ein mai ída vetíi anunu ánain bákurinten mifo Tiyarafenun anunu ánain dakhafen ena nanin bantai yorarién ná aya ino.

Porini Amusin Baya Ino

1 ¹Téi vava ma varen orin banta Pori uno. Baya ma varen orin dorarí ino van ma vara ráke vanta kayo ano fi áa mana vanta ano fi ída séin aní uren ákona simikhen mifo Yisas Karaisin má inká bein ma furin pintena avían mantakhein Afóe Tiyarafenu vá anon mai ákona simikhen mino.

²Minó mumunan ayofi afá aváeyan manon ten má manafiní uven mi ma vompon uvaman Karesiá ma vain monó kayofin ma vaona nanin bantan amen mino.

³Tifóe Tiyarafenu vá Bafan Yisas Karaisini sarisari vá ará kusin má ano vá tiretin má bano. ⁴Yisas Karaisi anon teti Sifóe Tiyarafenui anunu ánain dakhafen mi saréa ma vain namu avúavá pintena setin tiya ono van e fúkaren mino. ⁵Máan tukhein nará Tiyarafenu avisá ena ena yaní ó tifano. Pura ino.

Kama Vaya Mana Anan Ban Mino

⁶Yisas Karaisini yoran táké uaren ma Tiyarafenu ano siretin kamaen tarisari uren arákaya ma veni vanasií ukharé eona kéká ano ma aine véin me oyan amire ma enará ukhein monó baya ánain ma yakhafiya ona van mi séi sinúdiyá uno. ⁷^bÍda ena kama vava van mifo manáa kéká anon

^a 1:4 Kar 2:20 ^b 1:7 Apo 15:1, 24

tiretin maman kufa uádaren mi Yisas Karaisini kama vayan do vaéádiyan mino.

⁸ Máan tiyan mifo fefá ma siamékuya inikhá inona kama vaya vá ma ída manái ukhan nain monó baya ma setí ankan pinte safu áa inaru fáke enisori ano fi ma me siamin nain mano vá ira khiyan ma uman baren berai siyan purin barufin ná típá o afeyorano. ⁹ Tetí ankan pefái siamikharéi saréa evarané ákona iyá uno. Pefá ma inire afová ukhá inona monó baya vá ma ída manái ukhan nain baya ma me siamin nain banta ano vá ira khiyan uman baren ma verai siyan purin barufin ná típá o afeyorano.

¹⁰ ^d Banasi amusin uantano vara ma vaya siya raumpo Tiyaafenun mi amusin uantiyá uno. Banasi amusin uantano van ma iyanté maé mai séi ída Yisas Karaisini yoran banta uno.

Yisas Karaisin Pinté Erikhein Bayan Pori Siyan Mino

¹¹ ^e Mumunan tiyofi sifá tiváeyan noe, afovasá ono. Mai ma aya uren ma evaránen aviran baya ma siretin tiamikheruna mai ída mana vanta finté erikhen mino. ¹² Mai vaya ída mana vanta finte varékun inká mana vanta ano ída afova simen ukhen mifo Yisas Karaisi anon aú páke vaya simikhen mino.

¹³ ^f Pefá ma Yutan kayoi avúavá ánain ma ákonaé dakhafiyáké maé Tiyaafenui vanasi vá monó bá namuroí uré minó aruan kípano van iyákuya afová ukhare ono. ¹⁴ ^g Téi Yutan kayoi avúavá ánain ákonaé dakhafiyá paséi sinafu siráoni avúavá ánain ma yakhafimpin te sivun kéká esantakharé uno.

¹⁵ ^h Máan tukhé umpo sínóen amúpim ma vákun mi mai ma Tiyaafenu ano ma aní ein damúi vei sarisarifó téin tararen aní urá baréi e vantaí é uno. ¹⁶ Bantaí uvékun ena anan nanin bantafin be Anini kama vaya siamino van béin ten aníen mino. Aní ma urá maé mai vayai ana sisimino van ída manáa kayorá mo inaé uno. ¹⁷ Inká téi ída vákun ma vaya varen orin bantaí ukharé ein banta kayo onano siré ída ainé Yerusaremí ódé umpo Arebíá barafái o varé maé mai ráké evarané Damaskasí oré uno.

¹⁸ ⁱ O vákun kanú manaú orana orivíká Pitan onano van Yerusaremí ódé ben má un bákun fiftini (15) yamú oren mino. ¹⁹ Yerusaremí ma o váké maé baya ma varen orin banta kéká pintena ída mana oné umpo Bafan afá Yemisin manan oné uno. ²⁰ Máan tukheruna van mi saréa ma uvaman amiyaruna vaya mai Tiyaafenu avorá ída kampun tiyá uno. ²¹ ^j Máan turé mai oyampáké Siriá bá Sirisiá barafá bá oré uno. ²² Oré umpo Yisasini vanasi ma Yudiá barafin ma vain kayo ano ída sen toman afová

^c 1:8 1Ko 16:22 ^d 1:10 1Te 2:4 ^e 1:11 Mat 16:17 ^f 1:13 Apo 8:3 ^g 1:14 Apo 22:3

^h 1:15 Ais 49:1; Kar 2:7 ⁱ 1:18 Apo 9:26-27 ^j 1:21 Apo 9:30

ukharen mino. ²³Máan tukharen mifo vanasi ano ma máa siyain baya anan inikharen mino. “Mai ma setin tiriyáken ma inká tetí ma mumunan iyaruna yaná ma máden namu ono van iyaré ein banta ano saréa mairá mumunan iyáken mai ma fefá namu ono van iyaré ein mumunan nan mi sian banasi amiyan mino” sin baya ma iniren maen ²⁴mai van Tiyarafenu aví daní iyan mino.

Ena Aposeri Kayo Ano Ma Porin Má Ará Mana finí Ein Baya Ino

2 ¹^kFotini (14) orana orivíkái Banabasin nú Taitasin nú bá Yerusaremí evaráné ódé uno. ²Tiyarafenu anon téin aní uren maifá orino síkái Yerusaremí ma oré o váké maé ena nanin bantafin ma yoriyá eruna vaya kayo mai monó ánon banta kéká anan tiamiyaré uno. Taréa ma yoriyaruna yoran má peyante yoran má ano fara savifá o afeyoran nain nan mi vetí ankan iniren ará manafiní ino van mi máan té uno. ³Inká Taitasi maen Kiriki anan bantan báken téin má bákan mifo véin au khavino van betí ankan ída sen mino.

⁴^lÍda máa sen mifo Yisas Karaísi ano ma man bayai karavusi fintena ma setin tivíkein avúavá ma aní ukhein baya ma átaru uvé tiyá tiferunafin manáa kampun mumunan bain banta kéká ano e féken tifuriyaren mi mai karavusifin tetin evaránen tivían kaono van mino. ⁵Máan tono van en mifo mai fara va vetin tító máa ída afokhan ame rauno. Kama vayai fura yaná ano siretin má para vano van muno.

⁶Kokhon nanin banta ano Yerusaremí monó ánon bantaí ma ukhein kéká san kákan bí manten nen ten inikhen mifo séi ma inikheruna mai ída kákan daná ino. Mai fara vara seyo, aví bain má ída aví bain má ano Tiyarafenu avorá manaí anan ukhen mino. Mai van mi monó ánon banta kéká ano senti vayará ída manáa mo asotúen mino. ⁷^mÍda manáa vaya mo asotú ukhen mifo Tiyarafenu ano ma Yutan kayofin kama vaya siamin doran ma Pitan ameiní en ena anan nanin bantafin ma kama vaya siamin doran téin timikhen mino sen afová ukhen mino. ⁸Mai fara vara seyo, Tiyarafenu ano ma Pitan má bákan ma Yutan kayofin doriyá einí anan en mi sen má báká ena anan nanin bantafin doriyá uno. ⁹Yemisi, Pita, Yoni néne van ma vanasi ano monó ákona uantan banta kéká ino ma siyain kéká anon mai ma Tiyarafenu ano séin tarisari uren ma ma yoran timikhein ódaren mi Banabasi rasan nan kana ino siren e sivían betimpin kaen mino. Máan turen mi verasan ákonaen tisimiyáken tirékan ena anampin doresirá inká teti Yutan kayofin dorano sen tisimen mino. ¹⁰ⁿMáa siren mana vaya ma sisimein mai ona ma ída van nanin banta aya ino van mi sen mifo séi mai yoraríi fe iyákéi ákonaé doranté uno siré timusin é uno.

^k 2:1 Apo 15:2 ^l 2:4 Kar 1:7; 5:1, 13 ^m 2:7 Apo 22:21 ⁿ 2:10 Apo 11:29-30

Pori Ma Pitani Namu Avúavá Maman Dákó Ein Baya Ino

¹¹Pita ma Antiokí erí maéi véi ma namu avúavá bariyain nan ben avorá asé uno. ¹²°Béi ma esé o unaven maen ena anan nanin banta ano ma monópin bain má kama avúavá en manafin kumamen dunan niyaren mino. Máan tiyaren mifo ínaimpáké Yemisini kéká ma oríkan maen au khavin avúavá ánain ma yakhafiyain kayo van péden betin má ída manafin kumamen dunan nen mino. ¹³Máan tíkan inká Yisasintá ma mumunan iyain manáa Yutan kayo vá ano yere mai kampun avúavá barákan mai avúavá ano Banabasin má dere e avíádan maifin oren mino.

¹⁴Máan tiyáken betí ankan ída kama vaya ánain puntáden dakhafiyái téi ódaréi ena kéká avorá Pitan tiamé uno. “Éi Yutan anan banta anon ena anan banta ano ma Yutan kayoi avúavá ánain dakhafeyíni iyákeya ena anan banta ma vainíi ukha ompo fará ena anan kayo van Yutan kayoi avúavá ánain dakhafino van duvun iya fono.”

Yisasintá Ma Mumunan Iyain Nanin Banta Van Ma Funtákein Kéká Ino Sein Baya Ino

¹⁵Máa siré tiamé uno. “Erasan Yutan anampin mi afoká ukhé umpo ume van ne ma siyain anampin ída afoká ukhé tiféuno. ¹⁶°Mosesini man baya ánain ma yakhafintá Tiyaarafenu avorá ída funtákeruna nanin bantaíi ó tifanté umpo Yisas Karaisintá ma mumunan inain nanin banta ano anan Tiyaarafenu avorá puntáken banten mino. Yisas Karaisintá ma mumunan iyá tiferuna mai aa sáké anan Tiyaarafenu ano setin nan puntákein nanin banta e sinten mino. Mai fara vara seyo, mana nanin banta ano ída kanaíen minó man baya ánain ma yakhafin naintá Tiyaarafenu ano funtákein nanin banta ino sinten mino.

¹⁷“Yisas Karaisintá ma mumunan ó tiferuna mai ano anan Tiyaarafenu avorá puntákeruna nanin banta vanté tifé umpo seti Yutan kayo vá deren ena anan nanin banta an dé umeí iyá tiféuno. Yisas Karaisi anó ayaen ume ákona uanté iyan nafino. Ída uron mino. ¹⁸Mai ma séi ankaman barákukhá onunan man baya ma evaráné uvaranté maé mai séi man baya yurafurein bantan bá uno senté uno. ¹⁹Mai fara vara seyo, man baya ánain ma vákurékun mai ano furino sin nain nan pasé mai ánain ída vákuronté umpo Tiyaarafenu vái súpá ukhé banté uno. ²⁰°Máan tukhen nan mi Karaisi má téi fe fúkéi séi seyan na va raumpo Yisas Karaisi anon tempin ban mino. Tiyaarafenu Anin mano ma séi nan moéken anunu uaren ma sen nan e fúkein mumunantái vá uno. ²¹Tiyaarafenu sarisari ída maman paen danasí uré do ékano van muno. Mai fara vara seyo, Mosesini man baya ano ma Tiyaarafenu avorá tetin maman puntákein nanin bantaí ma intin maen mai Yisas Karaisi fasavin puren mino.”

Man Baya Ma Yakhafin Avúavá Bá Mumunan In Avúavá Bá Baya Ino

3 ¹Karesiá nanin banta ano ma óen iya vaona oe, Yisas Karaisin ma yaa unkamádantá arukhá ein tiamékuya siretiyantá mai fefái siretin ma oneinú ukha ompo saréa iye anó tiretí ineine asuse uantiyan nafino. ²Téi siretimpin mana vaya máan ina onté uno. Tiretí ankan ma Kantá Aunan bareona mai man baya ánain ma yakhafintasá bare rafono. Áa kama vaya ma iniren mairá ma mumunan in tasá bare rafono. ³Kantá Aunani ákonarái araíe mumunan ukhare ompo fará óen uareyá tiretí ákonará mantákheyá Tiyaarafenu ano kama vanta e sinten mino siya rafono. ⁴Mai ma ara uman kayo ma siretimpin afoká iya ma verai siyáke ma variyá eona mai náiná anarasá mantareyá taréa fasavifá mai mumunan karúdanto rafono. ⁵Tiyaarafenu ano ma siretin Kantá Aunan amíden ma enará ukhein avúavá ma siretimpin aní iyain mai Mosesini man baya ánain ma yakhafiyaona rasafino. Ída ino. Karaisini vaya ma inire mumunan iyaonará ino.

⁶“Abaraamun ná onano. Beni mumunantái Tiyaarafenu ano funtákein banta e sikhán mino. *Esé 15:6*

⁷Máan tukhein nan mi Tiyaarafenurá ma mumunan iyain kayo van Abaraamun akhafana ino se afová ono van muno.

⁸“Ena anan nanin banta ano kama vayará mumunan intin betin nan puntákein nanin banta e sen aranten pasen mi Tiyaarafenu ano afová ukhen kama vayafó pefái Abaraamun iyáanten bei Vompon dókifin máa sikharen mino. “Éin pintéi uaré ma varafin ma vain nanin banta minó avábá uantanté uno.” *Esé 12:3*

⁹Máa sikhén pasen mi ventá ma mumunan inain kéká ano yeren mai ma Abaraamu mumunan uren barein avábá baranten mino.

¹⁰Máan tinten mifo man baya ánain ma setí ankan bákurónuna anon Tiyaarafenu avorá puntákein nanin bantaí onté uno ma sen inin nain kayo amaninái Tiyaarafenui aran naná banten mino. Mai fara vara seyo, Tiyaarafenui vompon dóki ano máa sikhén mino. “Tiyaarafenui vompon dókifin ma minó man baya vain ánain ma ída vákurin nain nanin banta amaninái veni aran naná banten mino.” *Diu 27:26*

¹¹“Máan tukhein nan mi man baya ánain ma yakhafin nain nanin banta ano Tiyaarafenu avorá ída funtákein kayon banten mino sé afokái afová ó tifanté uno. Mai fara vara seyo, Tiyaarafenui vompon dóki ano máa sikhén mino. “Mumunan ma inain nanin banta van mi Tiyaarafenu ano funtákein nanin banta e sirantin ayun para vanten mino.” *Aba 2:4*

¹²“Man baya ánain ma yakhafin maen mai mumunan má ída manái ukhen mino. Mai van mi Tiyaarafenui vompon dókifin máa sikhén mino.

^r 3:6 Rom 4:3, 16; Yem 2:23 ^s 3:8 Rom 4:3, 16; Esé 18:18; 22:18 ^t 3:11 Kar 2:16

^u 3:12 Rom 8:3

“Ayun ma fara van oriyen ban aunan ma varano van inain mano vá minó man baya ánan ná bákurino.” *Riv 18:5*

¹³Máan tinten mifo man baya ano setin uman timiyaréin mi Yisas Karaisi ano setin evaránen tivirano van daa unkamádantá e fúkan mi mai van Tiyaarafenui vompon dóki ano máa sikhén mino. “Daa unkamádantá ma furin nain nanin banta amanináí Tiyaarafenui aran naná banten mino.”

Diu 21:23

¹⁴Tiyaarafenu ano ma Abaraamun iyáantákaré ein mai avu ena anan nanin banta ano Yisas Karaisin pintéi uaren evaránen aviranten mino. Máan tukhein nan mi mumunantá anan mai ma iyátintan baré ein Kantá Aunan baranté tiféuno.

Man Baya Vá Tiyaarafenui Iyáantan Baya Fáke Vá Ino

¹⁵Mumunan tiyofi sífá tiváeyan noe, seti ma ma varará bá tiferuna fákena vaya siamékuya inin nono. Mana vanta ano ma ve ina yanasinta yaíden ma ve akhafana iyáantádú uren ma vompon uvamádantin baré inain mai ída ena vanta ano yo varen nafi inká asótúen nafi inten mino.

¹⁶“Tiyaarafenu ano Abaraamun má be anin máí iyáantákaren mino. Mai van mi Tiyaarafenui vompon dókifin ída kokhon iyampon nan “e akhafanafin” ne sikharen mifo “e akhápin” ne ma sikaré ein mai Yisas Karaisin nan mi sikharen mino. ¹⁷“Ma ma siyaruna vayai ana máan mi ukhen mino. Tiyaarafenu ano Abaraamun má ma kasen manafin ban baya siran ma fo antareti ifo teti (430) orana orivin maen ínaimpákéi man baya afoká ukhein pasen mai man baya ano mai ma ará manafinien ma inká iyáanten ukharé ein baya ída yo avékaan akhempá kauken mino. ¹⁸“Mai fara vara seyo, Tiyaarafenu ano vei sarisari fói Abaraamun iyáantákaren mino. Máan tukhein nan mi man baya finté ma uaré minó daná bariyákun maen mai ma iyáanteini aran ída afoká inten mino.

¹⁹“Máan tinten mifo mai fará man baya amen nafino. Tiyaarafenu ano fefái iyáantáken mi ume aní ino van man baya amikharéin mai ma Tiyaarafenu ano iyáantan baré ein iyampon ma afokáin mairái me kanaíen mino. Tiyaarafenu ano man baya enisori kayorá dákan inká enisori kayo ano aúban banta Mosesin amíkan mi setin timikharen mino. ²⁰Kankanan banta ano ma ará manafiní ono van maen aúbaná bantan dosiren ará manafiní é iyan mifo Tiyaarafenu veyáká anan báken beya anon Abaraamun iyáantákaren mino.

Man Baya Maen Mai Setisi Yafisin Tifóe Ino

²¹“Máan tukharen mifo mai ma Tiyaarafenu ano fefá iyáantan baré ein masá man baya ano namuroí ukhen nafino. Ída uron mino. Man baya ano

° 3:16 Esé 12:7 ° 3:17 Eks 12:40 ° 3:18 Rom 4:14 ° 3:19 Apo 7:38; Rom 5:20

° 3:21 Rom 8:2-4

ma auyen aunan ma simiyantí tiferá mai ánan ná dakhafiyá Tiyarafenu avorá puntáké bá tifano. ²²Máan tó tifanté umpo Tiyarafenui vompon dóki ano máa sikhen mino. Ume anon minó nanin banta karavusií uádá bá tifé umpo mai ma Tiyarafenu ano ma iyáantan ma vain danasinta ma vará tífanuna aa ma vain mai Yisas Karaisintá ma mumunan in mano ino.

²³ ^aMumunan in ma ída yákó ukhan maen man baya ano setin karavusií uádá eriyaré ékun mi Karaisintá ma mumunan intin ma man bayai karafusi finte ma útútintan aa Tiyarafenu ano maman dákó en mino. ²⁴ ^bMan baya ano yafisin tifóení ukhen tetin afova simiyan tiviren eriyaren Yisas Karaisin táí me khaen mino. Máan tukhein nan mi Karaisintá ma mumunan é tifékun maen Tiyarafenu ano setin nan puntákein nanin banta e sinten mino. ²⁵Máan tukhein nan mi mumunan inka yákó ukhein teti ída evarané mai yafisin tifóeni aránaópá banté tiféuno.

Yisas Karaisin Pintéi Tiyarafenu Akhafanaí Ukhé Tiféuno

²⁶ ^cMáan tukhein nan mi Yisas Karaisintá ma mumunan eona anon Tiyarafenu akhafanaí ukha ono. ²⁷ ^dPara vara seyo, monó non ma vareona anon Yisas Karaisin má túpá uveya véin maman ayá au anamun ma einíi ukha ono. ²⁸ ^eTaréa ída Yutan banta van ena anan banta van ída miyan ban doran banta van para van banta van inká ída afon ban anasi van ukhen mifo minó ano Yisas Karaisimpin o asotú uveya manan ba ono. ²⁹ ^fYisas Karaisini kéká ma vanteya mai siretí ankan Abaramun akhafanan baona minó daná ma Tiyarafenu ano ma véin iyáantákaré ein mai siretin ninaíi inten mino.

Mumunan Nanin Banta Ano Ma Tiyarafenu Ina Yanasinta Varan Nain Baya Ino

4 ¹Tenti vaya máan mi ukhen mino. Iyampon kéká ma arará bantin ma vetí afóe ano ma ve ina yanasinta me amiren púká intin maen mai iyampon kéká ano miyan ída van doran banta kayo ída esantanten mifo vetin má manaí ukharen ma e anoní uven mi minó betí afóen nina yansinta varanten mino. ²Betí ankan betíi yafisin banta kéká oo yaiyen oriyantin ma vetí afóe ano ma siran nain orana máa ma orivintin mi vetiyantá dafisinten mino.

³ ^gYisas Karaisi ma ída erikhá maé tetin má dere máan manan é ma vara ráke man baya kayoi miyan ída van doran nanin bantan baré tiféuno. ⁴ ^hMáan tukharé é tifékun mi veni yamú puntáden afoká iyain má Tiyarafenu ano ve Anin tiantan anasi arápin eravíkan béin kauádan

^a 3:23 Kar 4:3 ^b 3:24 Rom 10:4 ^c 3:26 Yon 1:12 ^d 3:27 Rom 6:3 ^e 3:28 Rom 10:12
^f 3:29 Rom 4:13 ^g 4:3 Kor 2:20 ^h 4:4-5 Yon 1:14; Rom 1:3

maen mai man baya aránaópá baren mino. ⁵Báken mai man bayai miyan ída van doran bantaí ma ukháé tiferuna evaránen tivíden maman Tiya rafenu akhafanaíen mino. ⁶ⁱTiretí ankan inka Tiya rafenu akhafanaí uven nan mai van mi ve Anini Aunan tiantan tiretimpin eriven mai Aunan manon “Abba,^j Tifóe oe,” sen ariyan mino. ⁷Máan tukhein nan mi siretí ankan ída evaráne miyan ída van doran nanin bantaí in nompoinka Tiya rafenu akhafanaí ukha ona ve ma iyáantan bain danasinta varan nono.

Pori Ma Karesiá Nanin Banta Van Ma Inikhein Baya Ino

⁸Pefá ma siretí ankan Tiya rafenun ma ída afová ukhe mae kampun ayarafenu kayoi miyan ída van doran banta kékái vare ono. ⁹Máan tukhare ompo saréa inka Tiya rafenun afová e onó tente rafu áa Tiya rafenu ano siretin pefái afová ukhen né tente rafuno. Máan ma ukhaya mai fará evaráne ma varará ma ída ákona vain man baya kayoi miyan ída van doran nanin bantaí iya rafono. ¹⁰^kTiretí ankan mai ma kákan damú ma afoká é iyain nafi biyon nafi aú damu safi inká orana fi vákuriya mae Tiya rafenu ano siretin nan anunu ino van avébe yafisé iya ono. ¹¹Máan tiya ompo senti yoran ma savifá o afeyoran nain nan mi siretí avúava san tikhokho fiyan mino.

¹²Mumunan tiyofi sífá tiváeyan noe, séin má manaí ono van mi ákonaé tiretin tiamiyá uno. Mai fara vara seyo, séi seyantá man baya ampiré tiretin má manaí uvékuya séin ída namu usinte ono. ¹³Tiretí ankan ná ovare me ineno. Téi sí mantéi Yisas Karaisini kama vaya esé arái é tiameruna ino. ¹⁴Téin tu ano ída ákona ukhen mai anon tiretí ankan uman amiya ompo séin ída afonkarí ureya oyan timinton Yisas Karaisin nafi áa Tiya rafenui enisori fi ma avíde kama yafisirí eonafí séin e ono. ¹⁵Tetimpin ma simusin baré ein taréa mai intefasá ban nafino. Mai yamú kayofin tiretí amusin iyákeya minó daná time ompo kanafen bainti siretí auu vá inan bían timinonaren mino. ¹⁶Ma fura vaya ma siretí ankan tiamiyaruna anó téin maman tiretí namurof iyan nafino.

¹⁷Mai kampun banta kayo ano siretin o avíádantiya vetin ánain bákurano van mi ákona yorará iyan mifo siretin aya ono vara ino. Ída ino. Tenti aa iyádantiya vetin ayain ineine ana ono van mino. ¹⁸Ena nanin banta ma kama ure o avíádesin ma siretin ánain bákurin doran tasá ákona inin kaono. Téi ma ída váku yere vá mai ma variyaonaí ana vá ono. ¹⁹Te sikhafana oe, anasi ano ma inamunan iniyan ma aureiníi iyá uno. Mai fara vara seyo, Yisas Karaisi ano siretin aúpin dákó ino van muno. ²⁰Taréa séi ída siretí ankan má bá umpo siretin má bano van

ⁱ 4:6-7 Rom 8:15-17 ^j 4.6 Aramaiki vaya finté *Abba* e ma siyain mai Tifóe oen tiyan mino.

^k 4:10 Rom 14:5; Kor 2:16

mi inikhé uno. Tiretin má baré kama vaya anan tiamen nunaren mino. Tiretin inté uresá ya onte rafunon tiré taréa amino ukhé uno.

Akhan Nú Saran Núká Ma O Siaren Tikhein Baya Ino

²¹Man baya aránaópá ma vano van iyaona nanin banta ano sisimeno. Beni vaya ana ano náí yanasará tikhen nafino. ²²Tiyarafenui vompon dóki ano máa sikhen mino. Abaraamun anin mai kankanán mi varen mino. Miyan ída van doran nanin mano mana khain maen inká aví nanin mano mana khain ukharen mino. ²³^mMai ma miyan ída van doran nanin mano ma khaein iyampon maen mai vanasii avúavá kái khaen mifo aví nanin mano ma khaein mai Tiyarafenu ano ma iyáantákaré ein mino.

²⁴Tiyarafenu ano ma kan dádá ará manafíní eini aman manon mi maí kan nanin ban mino. Akhan maen Sainaí anui aman manon mi aní ukhan mai anurái vanasi ano esé araífen man bayai miyan ída van doran nanin bantaí ukhan mino. ²⁵Máan tukhá ein nan mi Arabiá barafá ma Sainaí anuyon bain má Yerusaremí bá manaí ukhan Akhan mai an mi yakhen pasen ben má be akhafana vá anon miyan ída van doran nanin bantaí ukhen mi maifin ban mino. ²⁶ⁿMáan tukhen mifo inarufá ma fara vain Yerusaremi maen mai aví nanin Saran an mi yakhan béi setin tinóe ino. ²⁷Para vara seyo Tiyarafenui vompon dókifin máa sikhen mino.

“Aaí ma ukheya iyampon ída khaiyaona nanin mano vá amusin ono. Éi iyampon ma ída khaen nan au ída aí ukhein nanin arasá kama ino.

Oovarare amusin iya vá í dano.

Para vara seyo, aa nanin ma varé ein mano iyampon ma kokhon ná kain baré ein nanin kayo esantaren béi kokhon iyampon kainten mino.”

Ais 54:1

²⁸^oMumunan tiyofi sifá tiváeyan noe, siretí ankan Aisakin an deya iyáantan iyamporinta ono. ²⁹^pIyáantantá ma afoká ukharé ein iyampon Aisakin ma miyan ída van doran nanin akhá Ismaeri ano ma máká maáká einí en Kantá Aunantá ma afoká ukheruna kéká man baya ánain ma yakhafino van iyain kayo ano uman timinten mino.

³⁰Máan tinten mifo Tiyarafenui vompon dóki ano náiesá tikhen nafino. Mai máan mi sikhen mino. “Miyan ída van doran nanin má be akhá bá tiantan orino. Miyan ída van doran nanin akhá ano ída vá aví nanin akháí ona yaíden barano.”

Esé 21:9-10

³¹Máan tukhein nan mi mumunan tiyofi sifá tiváeyan noe, setí ankan miyan ída van doran nanin akhá ída vá tifé umpo aví nanin akhafanan bá tiféuno.

¹ 4:22 Esé 16:15; 21:2 ^m 4:23 Rom 9:7-9 ⁿ 4:26 Ibu 12:22; Rev 21:2, 10 ^o 4:28 Esé 15:4-5; Rom 9:7 ^p 4:29-30 Yon 8:35

Yisas Karaisi Anon Tetin Kama Uren Kusin Timirá Bá Tifé Uno

5 ¹Yisas Karaisi ano inká man bayai karavusi finte útúden tetin maman kusintá kaí bá tifé umpo mantaan ákona uveya vá ará kuse vano. Ída vá evaráneya man bayai miyan ída van doran nanin bantaí uvesin ná damuádantiya vano.

²Ineno. Téi Pori anon ma vaya siretí ankan tiamiyá uno. Au khavin avúavá ma fara fákare vante mae mai Yisas Karaisini yoran mano ída uron mi siretin ayainten mino. ³E au ma ifáe nan ma khaviyain kayon evaráne tiamenté uno. Maa ma iyante mae mai minó man baya ánain ná avové ure yakhafono. ⁴Mai fara vara seyo, man baya ánain ma yakhafin mano ma Tiya rafenu avorá puntákein nanin bantaí ma inte ya mai Karaisin pintena siretin do síkarantiya Tiya rafenui sarisarifin ída van nono.

⁵Máan tin nampo setí ankan puntákein bí barano van ma inikheruna kéká ano Kantá Aunani ákonará mumunan ukhé mai van mi ave ukhé bá tiféuno. ⁶^qMai fara vara seyo, Yisas Karaisintá ma mumunan iyá tiferuna mai anon au ma khavin má ída ma au khavin má maman paen danasí ukhen mifo Tiya rafenurá ma mumunan uren ma ena nanin banta ma ará amin manon pura yanasí ukhen mino.

⁷Tiretí ankan kama e oriyare ompo iye anó tiretí aa iyádayá pura yaná ma yakhafiyá eona me ifáe rafono. ⁸Mai ma saréa yakhafiyaona ineine mai ída Tiya rafenu finté erikhein mino. ⁹^rMáan tukhen mifo siretin aúbaná mana namu vanta váken mi sító máa yisi ano ma ainen beretifin orera einfí iyan mino. ¹⁰^sBafan mano siretin evaránen avíádantiya séi ma mumunan iyararuna yanasintará mumunan onono sé inikhé uno. Mai ma siretí ineine máden asuse uren ma uman amiyain banta kéká Tiya rafenu ano yaíden uman aminten mino.

¹¹Mumunan tiyofi sifá tiváeyan noe, banta ano vá au khavino ma siyákun mai fará betí ankan téin tirirí iyan ban nafino. Téin ma sirirí iyan bain manon aní iyáken mi Yisas Karaisini ma yaa unkamádantá purein mano ma vanasi evaránen avíkein baya siamiyan bano van mino. Mai avúavá anon betí ankan aran naná amé iyan mino. ¹²Au khavin avúava san ma siretin uman amiyain mai kayo ano vetí au vasá kavino.^t

¹³^uMumunan tiyofi sifá tiváeyan noe, Tiya rafenu anon tiretin maman kama uren mi kuse vano van anunu ukhen mifo ída vá evaráne ume avúavápin oriyaya avábá posá ben moéken ayain maran ná iya vano.

¹⁴^vMai fara vara seyo, minó man baya ano mana man bayafin manan

^q **5:6** 1Ko 7:19; Kar 6:15 ^r **5:9** 1Ko 5:6 ^s **5:10** 2Ko 11:15; Kar 1:7 ^t **5:12** Betí avankan masá do vían karúdano. Béi aran nan uaren tikhein baya ino. ^u **5:13** 1Pi 2:16
^v **5:14** Rom 13:9

bákan mai ano máan mi sikhen mino. “Eyan nan ma anunu iyaonaíe vá ena van anunu ono.”

Riv 19:18

¹⁵Máan tin nampo ída ma ará amin maran into ma aruve asive ana ma inteýa mai sireti yantái namuin maran inompo yafían ná ákona ono.

Kantá Aunani Ákonará Ma Van Baya Ino

¹⁶Máan tukhein nan mi Kantá Aunani ákonarasá auyen aunan mamare vá ume avúavái anunu ánain ída yakhafono van mi inin amiyá uno.

¹⁷“Para vara seyo, ume avúavá bá Kantá Aunan má ano ven maman bararasí in maran iyáken maen aruve asive iyain pase mai ma varano sinona yaná ída kanaíe varan nono. ¹⁸Máan tin nampo Kantá Aunan mano ma aviren orinti mae mai ída evaráne man bayai aránaópá ban nono.

¹⁹“Tiretin ará ma mantanti ma ume avúavá ánain ma yakhafesin maen tiretí vampin ma yanasintan afoká intin ena nanin banta ano mai avúavá kasaen onanten mino. Pamúku avúavá bá pain avúavá bá namu avúavasí ono van ma ará manta avúavá bá ²⁰inká kampun ayarafenurá ma monó tin avúavá bá uvátakhan avúavá bá namuroí in avúavá bá arankantin ma asivin avúavá bá ará namu uantan avúavá bá ena ina yana san anunuin avúavá bá eyan nan mana inin avúavá bá bayafó aruvúden aúban daimin avúavá bá ²¹kamaen bain banta kayo ma ará namu uantan avúavá bá ákona non naren ma óen uaren báden non avúavá bá ino. Máan avúava sinta vá ma varé in nain nanin banta ano ída uron mi Tiýarafenui yafisin pintena yanasinta varantéíi mai ma fefá tiamiyá erunafí é tiamé uno.

²²Máan tukhen mifo Kantá Aunan mano ma setinti saunantá ma yafíben maen mayan aran mi imádanten mino. Ena van anunuin má amusin en kusen ban má bempáké báken ena avábá in má kamaen puntáden non avúavá bá ²³kayone en ban má inká ei avúaváká dafisin má ino. Ída ena man baya ano mai kama avúava sinta ánain ma vákuriyain aasá iýaranten mino.

²⁴Yisas Karaisini kékasí ma ukhein kayo ano fefái vetíi ume avúavá daa unkamádantá aruan púken mino. ²⁵Taréa ma Kantá Aunan mano ma setimpin ma vantirá mai minó tetin tufin ma Kantá Aunan mano ma yoriyain ánain mana vá dahafó tifano. ²⁶“Teti ankan ída vá te sivi daní erá aruvín afoká ino van ena ará antarerá inká ena ará namu ó tifano.

Intéa Ayun Ná Doká Inte Fo Mai Yanái Yuyasin Nono

6 ¹“Mumuman tiyofi sífá tiváeyan noe, siretí ankan pinté ma mana ano ma umefin eraven ankamitiya mae vá ákona e ma monó tiyaona

^w 5:17 Rom 7:15-23 ^x 5:19-21 1Ko 6:9-10 ^y 5:24 Rom 6:6; Kor 3:5 ^z 5:26 Fir 2:3

^a 6:1 Mat 18:15

kéká ano vá bempáké oriveya ayaesin ná bei avúavá puntarano. Siretin má dere mai akhenókafin erave ankamin nampo yaffán ná ákona ono. ²^bTiretí ankan afá aváen ayain maran ma inte ya mai Yisas Karaisini man bayan mo kanaí inono. ³Ena ano ma umampin bantiya ma eyan inian kákan bantaí ure ma ída ayainteya mai eyan mi mákasiya ono.

⁴Tiretí ankan intéa avúavasá barano vará inte fo mai yaíde afová ure vá barano. Mai fara vara seyo, éi ma ei yoran ma ída yaiminteya mai éi amusin manan inompo enai avúavá ída yaíde afová inono. ⁵^eMai fara vara seyo, mana mana anon bei uman mádú inten mino.

⁶^dTiyarafenui vaya ma afova amintin bariyan nain mai arú kékasá anona ayaen ná miyan amino.

⁷^eTiretí ankan ída vá Tiyarafenun máká maáká ono. Tireti ma máan inin baranteya mai siretiyan mi kampun tiantan nono. Éi ma fafasikharé inona yanayun tákena mai yaná dunan manan unafin nono.

⁸Mana ano ma ume avúavá póké ma ve augin danayun ma fafaseiní ma iyaren maen purin manan una finten mifo Aunan ma amusin uantiyaré inain manon Aunan pintena ayun ma fara van aunan mi o una finten mino. ⁹Máan tukhen mifo kama avúavá ma in nan ída vá tivesara ó tifano. Mai fara vara seyo, veni yamusí ma intí kama amusin mi unafó tifanté uno. ¹⁰Máan tukhein nan mi vanasi ma kama avúavá uantan afokhan ma vantí maé minó nanin banta vá kama iyáké mumunan nanin banta moéké kama ó tifano.

Porini Kípan Baya Ino

¹¹Onano ma kákan bompon kayon te siyampóké uvaman tiretin amé uno. ¹²Banasi ano vetin kákan bí amino van mi siretí ankan au khavono van augin kuráden baya siyan ban mino. Tetí ankan nan Yisas Karaisini yaa unkamádantái mumunan iyan mino siren betin arin nain nan mi feriyen mino. ¹³Au khavino van ma yuvun iyain kéká ano ída fura sen minó man baya ánain dakhafiyan mifo siretí ankan duvun intiya au kharesin mairá betí kákan bí barano van mino.

¹⁴Téi ída ena yaná aví daní onté umpo Bafan Yisas Karaisi ma yaa unkamádantá púkein mai ven aví anan daní onté uno. Tenti sinunu ma ma varafin bákan ma inká ma varai anunu ma sempin baré ein mai fefái Yisas Karaisini yaa unkamádantá arukhen mino. ¹⁵^fTetí ankan tu khakhe rafu áa ídá kakhe rafu mai ída kákan daná ino. Tiyarafenu ano ma setin maman auyení urá bá tiferuna mai anan pura yaná ban mino. ¹⁶Ma ineine ma fákaren ban nain nanin banta vá Tiyarafenu ano arunan uren ná ará kusiantantin ná beni auyen nanin bantaí ino.^g

^b 6:2 Rom 15:1 ^c 6:5 Rom 14:12 ^d 6:6 1Ko 9:11, 14 ^e 6:7-8 Rom 8:13 ^f 6:15 Kar 5:6; 2Ko 5:17 ^g 6:16 Kiriki vaya finté mai Tiyarafenui Auyen Isareri kéka san mi sikhen mino.

^{17h}Tare ráké ma oronuna mai ída vá á ékun ná ma yanasintará ena ano uman timiyan bano. Mai fara vara seyo, sen turá ma namon tifun kayo ma vain manon aníen Yisasin nina inon ten mi sen nan tikhen mino.

¹⁸Mumunan tiyofi sífá tiváeyan noe, setisi Bafan Yisas Karaisini sarisari ano vá tiretin má bano. Pura ino.

^h 6:17 2Ko 4:10